

■ EDITORIAL

Tge ch'ils daners fan cun nus

DA RITA CATHOMAS-BEARTH

Daners occupan nus tuts da la damaun a la saira, er sche nus gnanc realisain quai betg. Nus avrin la gasetta – e tge dat en egl? Las reclamas da Coop, Migros, Manor... rabats, sale, reducciuns. Tgi venda la rauba anc pli bun martgà? Na fissi betg il mument da cumprar per spargnar? Sin via a la lavur: placats d'assicuranzas, da viadis, da vestgadira. In pèr chautschas cun flurs per la stad, pertge betg? «P. pl. nagina reclama» – e tuttina è nossa stgaffa da brevs pli che plaina cun brochuras, carnets e gasettinass. Almain ina curta eglia. Gea, quest motor da segar fiss er meglier che mes clepper.

E lura las scrittiras d'organisaziuns caritativas adressadas persunalmain. Plunas quasi mintga di. L'entir mund dovra sustegn. Nua pudess ins gidar cun vigur e cun quant? La nauscha conscienza crescha. Il dilemma è grond. Ina donaziun para d'effectuar tant sco sem en in èr. Ma i dovra blers sems per ina racolta. Ils psicologs ils pli perderts e raffinads vegnan engaschads per motivar nus da spender daners, betg mo stimular l'economia, mabain er per sustegnair projects socials e culturals. Gea, nus vegnin dirigids e surmanads, betg mo per noss dischavantatg e n'èr betg per quel dad auters. Quests «accents» mussan tge ch'ils daners fan cun nus – e tge che nus faschain cun els.